



SIUMUT INATSISARTUNI ILAASORTAATITAT / LANDSTINGSGRUPPEN

Nuuk 19 februar 2010

Inatsisartut suleriaasiat § 36 imm. 1 naapertorlugu Naalakkersuisunut apeqquut imaattoq saqqummiuppara:

Naalakkersuisunut apeqquut:

1. **Tusilartut innarluutilittut nalunaarsorneqartut angerlarsimaffimmini najugaqartut qarasaasiamik peqartinneqarnissaat tassalu atortorissaarusorneqarnissaat Naalakkersuisut qaqugu pilersaarutigaat?**
2. **Tusilartut imminnut oqaloqatigiinnerulernissaat anguniarlugu nittartagaqalernissaat pilersaarutaava?**
3. **Taamatut tusilartut siunissami ukiumoortumik ataatsimoortinneqartarnerat ataavartunngortinneqarniarpa?**
4. **Tusilartut inuiaqatigiinni peqataalluarnissaat ulluinnarnilu pisartunik malinnaalluarnissaat anguniarlugu Naalakkersuisut qanoq suliniuteqarpat, eqqarsaatigalugu aamma nutaarsiassanik immersorneqartarnissaat.**

(Inatsisartuni ilaasorta, Ruth Heilmann Siumut)

Tunngavilersuut:

Ukioq novemberimi Innarluutillit Pillugit Ilisimasaqarfik Siunnersuisarfiutigisumit aaqqissorneqartumik tusilartut nunatsinniittut ataatsimoortinneqarput. Ataatsimoorneq pissarsiffiusoq takutinneqarmat nuannerluinnarpoq, peqataasut tiguartisimalluinnarnerat malunnarluarmat puigorunangilarput, taamaalillutik peqataasut siunissamik qaamasumik siunnerfeqartinneqarnerat ajunngeqaaq. Aammalu qarasaasiamik atuinermik annertusisamik pikkorissartinneqarnermikkut imminnut attaveqatigiissinnaalernissaminnut taamalu aamma silarsuarmut attaveqarnissaannik ilitsersorneqarnermikkut aqutissiuunneqarlutik.

Maannakkut inatsisartuni ilaasortatut paasiniaaninni paasinarsivoq, peqataasunit 20 missaaniittunit marlussuinnaat kisimik namminneq angerlarsimaffimmini qarasaasiaqartut, taamaalilluni pikkorissareernerup kingornagut attaveqatigiillualernissamut isumalluarnarugaluaq piviusunngorsinnaanngitsoq.



SIUMUT INATSISARTUNI ILAASORTAATITAT / LANDSTINGSGRUPPEN

Taamatut pikkorissareernertik ataavartumik iluaqutigilluassagunikku nammineerlutik qarasaasiamik angerlarsimaffimmini pigisaqarnissaat assorsuaq pingaaruteqartoq tamatta takusinnaavarput.